



Sunndal kommune
Postboks 94
6601 SUNNDALSØRA

Vedtak om forlenging av tidsrom for løyve til felling av jerv som gjer skade på sau i delar av kommunane Sunndal og Tingvoll

Fylkesmannen viser til telefonsamtale med Sunndal kommune v/ Marit Hjelmo 23.07.2018 og søknad på epost same dag.

Med heimel i naturmangfaldlova § 18 første ledd bokstav b) og § 77, jf. forskrift om forvaltning av rovvilt § 9, jf. §§ 1 og 13, gir Fylkesmannen i Møre og Romsdal Sunndal kommune løyve til å halde fram med fellingsforsøk på ein jerv frå 24.07.2018 kl 10.00 fram til 31.07.2018 kl 10.00. Dette fellingsløyvet er ei forlenging av fellingsløyve gitt 17.07.2018. Fellingsløyvet gjeld eit nærare geografisk avgrensa område i kommunane Sunndal og Tingvoll. Fylkesmannen har lagt særleg vekt på tidspunktet for skaden og på å hindre vidare skade på sau. Nærare vilkår følgjer av dette brevet. Sunndal kommune har ansvaret for organisering av fellingsforsøket.

Det blei formidla i telefonsamtale med Sunndal kommune v/ Marit Hjelmo 23.07.2018 at fellingsløyvet ville bli forlenga med ei veke.

Bakgrunn

Søknaden om skadefelling av jerv er fremma av Sunndal kommune på bakgrunn av funn av eitt dødt lam i stien ved foten av Smisetnebba på Ålvundeid i Sunndal 15. juli 2018. Lammet blei undersøkt av Statens naturoppsyn (SNO) sin rovviltkontakt neste dag, der førebels dødsårsak er antatt jerveskade i Rovbase.

Det blei dokumentert ny jerveskade på lam 22.07.2018, og det er registrert fleire kadaver som ennå ikkje er obduserte. Det er og registrert at fleire søyer manglar lam. Det vil seie at skadesituasjonen held fram.

Juridisk grunnlag for avgjerda

Det rettslege grunnlaget for avgjerda er Lov av 19. juni 2009 nr. 100 om forvaltning av naturens mangfold § 18 andre ledd bokstav b) og § 77, jf. forskrift 18. mars 2005 nr. 242 om forvaltning av rovvilt (rovviltforskrifta) § 13, jfr §§ 1 og 13.

Naturmangfoldloven § 18 (annet uttak av vilt og lakse- og innlandsfisk etter vurdering av myndighetene):

Kongen kan ved forskrift eller enkeltvedtak tillate uttak av vilt og lakse- og innlandsfisk (...)

b) for å avverge skade på avling, husdyr, tamrein, skog, fisk, vann eller annen eiendom, (...)

Vedtak etter første ledd bokstav a til f kan bare treffes hvis uttaket ikke truer bestandens overlevelse og formålet ikke kan nås på annen tilfredsstillende måte. (...)

Rovviltforskrifta § 9 (Fylkesmannen sin myndighet til å iverksette betinget skadefelling):

Ved vurderingen av om det skal gis tillatelse til skadefelling skal det legges vekt på føringene i regional forvaltningsplan, jf. forskriften § 6. Felling kan bare gjennomføres dersom det ikke finnes annen tilfredsstillende løsning ut fra prinsippet om geografisk differensiert forvaltning. Det skal særlig tas hensyn til

- a. områdets betydning som beitemark*
- b. skadenes omfang og utvikling*
- c. potensialet for fremtidige skader*
- d. muligheten for å gjennomføre forebyggende tiltak*

Felling skal være rettet mot bestemte individer. Vedtak om felling skal være begrenset til et bestemt område, tidsrom og antall dyr. Det kan knyttes nærmere vilkår til fellingstillatelsen, herunder at bestemte typer dyr skal være unntatt, at felling skal foretas av nærmere bestemte personer, metoder for felling og utbetaling av fellingsvederlag og/eller dekning av påløpte utgifter med unntak av lønn mv. i forbindelse med felling. Felling og forsøk på felling i henhold til denne bestemmelsen gjennomføres uavhengig av grunneiers jaktrett, jf. viltloven § 35.

Rovviltnemnda i region 6 har i vedtak av 24. mai 2018 i sak 16/18 fastsatt en kvote på 5 betinga skadefellingsløyve på jerv i region 6 (Trøndelag og Møre og Romsdal) frå 1. juni 2018 – 15. februar 2019. Det er så langt ikkje felt jerv på denne kvoten. I vedtaket står det mellom anna følgjande om skadefelling av jerv:

Bestanden ligger på bestandsmålet per i dag (tre års gjennomsnittet). Terskelen for å tillate felling av skadegjørende jerv bør være lav i prioriterte beiteområder.

Fylkesmannen si vurdering

Etter naturmangfaldlova § 5 er det eit mål at artane og deira genetiske mangfald skal bli ivaretatt på lang sikt og at artane skal kunne forekomme i levedyktige bestandar i sine naturlege utbreiingsområde. Tiltak etter naturmangfaldlova skal likevel vegast opp mot andre viktige samfunnsinteresser, jf. § 14. Naturmangfaldlova § 5 og prinsippet om geografisk differensiert forvaltning er konkretisert gjennom §§ 3 og 4 i rovviltforskrifta og gjennom den regionale forvaltningsplanen for rovvilt i region 6.

Etter naturmangfaldlova § 7 skal prinsippa i §§ 8 til 12 leggjast til grunn som retningslinjer ved offentleg myndigheitsutøving. Offentlege vedtak som kan påverke naturmangfaldet skal så langt det er rimeleg vere tufta på vitenskapleg kunnskap om artar sin bestandssituasjon samt effekt av påverknad, jf. § 8.

Det nasjonale bestandsmålet for jerv er i rovviltforskrifta § 3 fastsatt til 39 årlege ynglingar. Bestandsmålet er vidare fordelt på fem av åtte forvaltningsregionar for rovvilt, jf. rovviltforskrifta § 4. I rovviltregion 6 er det mål om 10 årlege ynglingar. Dei fylkesvise bestandsmåla går fram av forvaltningsplanen, og er i Møre og Romsdal på 3 tre årlege ynglingar i Sunndalsfjella og Reinheimen.

Gjennom statusrapportar frå Rovdata og informasjon frå det nasjonale overvåkingsprogrammet for rovvilt har vi god kunnskap om jervebestanden og den samla belastninga jervebestanden er utsett for, jf. naturmangfaldlova §§ 8 og 10. Føre var-prinsippet i § 9 vert difor tillagt lita vekt i denne saka.

Førebelse tal frå Rovbase viser at det hittil er 17 dokumenterte eller antatte ynglingar av jerv i region 6. Fire av desse er registrert i Møre og Romsdal, 2 av ynglingane er i beiteprioritert område etter forvaltningsplanen. På landsbasis er talet 55 registrerte jervkull per 17. juli (kjelde: Rovdata, jervetelleren). Ut over nokre påkjørslar og predasjon, skjer avgangen av jerv hovudsakleg gjennom lisensfelling og skadefelling.

Fylkesmannen viser til forvaltningsplanen for rovviltregion 6, der det ikkje er mål om å ha jerv i den delen av fylket som denne saka gjeld. Talet på påviste ynglingar ligg førebels godt over det nasjonale og regionale bestandsmålet, og over det fylkesvise bestandsmålet. Samstundes har ein ikkje nådd målsettinga om at tre av ynglingane skal vere innafør forvaltningsområdet for jerv. Fylkesmannen legg til grunn at felling av ein skadegjerande jerv utanfor forvaltningsområdet for jerv innanfor fastsatt kvote frå rovviltnemnda, ikkje vil verke inn på overlevinga til den sørvestlege jervebestanden i Norge.

Skadefelling er eit verkemiddel for å løyse ein akutt skadesituasjon i eit område. Løyve til skadefelling er difor knytt til bestemte skadesituasjonar, og vert avgrensa i tid og rom. Felling kan kun iverksetjast om det ikkje fins andre tilfredsstillande løysingar ut frå prinsippet om geografisk differensiert forvaltning jf. rovviltforskrifta § 9. Fylkesmannen skal ved vurdering av iverksetting av fellingsløyve gjere ei særleg vurdering av den konkrete situasjonen opp mot følgjande fire kriterium; området si betydning som beitemark, omfang og utvikling av skadane, potencialet for framtidige skader, og mogelegheita for å gjennomføre førebyggjande tiltak. Ved iverksetting av fellingsløyve skal fellingsforsøket vere retta mot bestemte individ av rovviltarten.

Det beitar omlag 45 vaksne sauer og 90 lam i beiteområdet Seljebømarka, Rødset, Smiset på Sunndal si side. Dette er sauer frå to buskapar. Området grensar til beiteområde i Tingvoll kommune der det også er sloppe sau på beite i år. Både Sunndal og Tingvoll kommune er store sauekommunar i fylket målt i talet på søyer (kjelde: Landbruksmeldinga for Møre og Romsdal 2017-2021). Det er framleis tidleg i beitesesongen, og ein ventar ut frå kunnskapen om jerv, at tapa til jerv vil auke utover sommaren. Skadepostensalet er difor vurdert å vere aukande. Tidspunktet for skaden gjer at tidlegsanking ikkje er eit aktuelt tiltak no. Området er beiteprioritert område i forvaltningsplanen, og terskelen for å kunne felle skadegjerande individ i området skal vere låg.

Det er svært vanskeleg å lukkast med skadefelling på barmark. Skadene er imidlertid ferske, så det er grunn til å tru at den skadegjerande jerven held til i området.

På bakgrunn av funn av eitt dødt lam der dødsårsaka er antatt å vere jerveskade, gav Fylkesmannen skadefellingsløyve på ein vaksen jerv til 24. juli 2018 kl 10.00. Fellingsløyvet gjeld i eit nærare avgrensa område mellom Ålvundeid i Sunndal kommune og Meisingset i Tingvoll kommune. Grensa for fellingsområdet mot nord og aust følgjer kommunegrensa mot Surnadal, i aust kraftleidninga som kryssar Viromdalen over til Sandvika ved Sunndalsfjorden. Fellingsområdet er i Tingvoll kommune avgrensa mot vest av Bortervågen, Storelva og Hanemsvatnet, Rottåsvegen og Innerbekken, jf. kartvedlegg til sak vårt vedtak av 17.07.2018.

På grunn av at jerven ikkje er felt, og at skadane held fram, forlengar vi tidsrommet for fellingsløyvet med ei veke.

Fylkesmannen legg til grunn at fellingsforsøket vert gjennomført på ein effektiv og hensiktsmessig måte. Det vert sett av ei økonomisk ramme på kr 64 000 for kompensasjon for jegarar som deltek i fellingsforsøket i perioden 24.07. – 31.07. (§ 9a).

Vedtak

Ut frå vurderingane ovanfor og med heimel i naturmangfaldlova § 18 første ledd b) og § 77; jf. §§ 1, 3, 9 og 13 i rovviltforskrifta av 18.03. 2005, samt vedtak fatta av Rovviltnemnda for region 6 den 24. mai 2018 i sak 16/18, gir Fylkesmannen Sunndal kommune fellingsløyve på ein (1) skadegjerande jerv.

For perioden 24.07. – 31.07. innvilgar Fylkesmannen kr 64 000 til jegarløn (§ 9a).

Følgjande vilkår er knytt til iverksetjing av fellingsløyvet:

1. Fellingsløyvet gjeld frå 24.07.2018 kl 10.00 fram til 31.07.2018 kl 10.
2. Løyve til felling gjeld i eit område kring Smisetnebba, og omfattar areal både i Sunndal kommune og Tingvoll kommune. Avgrensinga går fram av kartvedlegg tilsend som vedlegg til vedtak datert 17.07.2018.
3. Fellingsløyvet vert gitt til Sunndal kommune, som er ansvarleg for fellingsforsøket.
4. Jervetispe i følgje med ungar er unnateke frå fellingsløyvet.
5. Fellingsleiar er Håkon Melkild. Fellingsleiar er ansvarleg for at alle som tek del i fellingsforsøket er kjent med vilkåra i dette vedtaket. Deltakarane i fellingslaget er meld inn skriftleg til Fylkesmannen.
6. Fellingsleiar og deltakarane i fellingslaget løyvet skal ha avlagt skyteprøve for bruk av rifle til storviltjakt seinast i 2017. Han skal òg vere registrerte som lisensjegerar, jf. Forskrift om utøving av jakt, felling og fangst, av 22. mars 2002, §§ 13 og 14.
7. Det skal berre nyttast våpen og ammunisjon som tilfredsstillar krava til jakt på jerv, jf. Forskrift av 22. mars 2002 om utøving av jakt, felling og fangst.
8. Felling eller forsøk på felling skal umiddelbart meldast til Fylkesmannen på mobilnr. 9092 6016 og til Statens naturoppsyn.
9. Dersom jerv vert skadeskoten pliktar dei ansvarlege å gjere det dei kan for å avlive dyret snarast mogeleg. Skyttar pliktar å forvise seg om påskote dyr er truffe eller ikkje. Ved skadeskyting skal skyttar utan opphald underrette Fylkesmannen og

næraste politimynde (tlf: 02800). Fylkesmannen avgjer vidare gjennomføring og avslutting av ettersøk.

10. Jerv felt i medhald av dette løyvet er viltfondet sin eigedom. Etter § 16 i Forskrift om forvaltning av rovvilt, skal jeger vise fram felt dyr for SNO for kontroll og prøvetaking så snart som råd etter felling. Jeger skal kunne påvise fellingsstad dersom SNO, politi eller fylkesmannen ber om det.
11. Felling og forsøk på felling etter dette løyvet kan gjennomførast uavhengig av grunneigar sin jaktrett, jf. viltloven § 35.

Klage

Dette vedtaket kan påklagast innan 3 veker etter at melding om vedtaket er motteke eller gjort tilgjengeleg i Miljøvedtaksregisteret; jf. forvaltningslova kap. IV, §§ 28 og 29. Ei eventuell klage bør grunngivast og skal stilast til Miljødirektoratet, Postboks 5672 Torgarden, 7485 Trondheim, men sendast til Fylkesmannen i Møre og Romsdal, Postboks 2520, 6404 Molde.

Alle vedtak som gjeld felling av freda rovvilt blir gjort tilgjengeleg på www.miljovedtak.no. Ein kvar kan fortløpande følgje med på vedtak som gjeld felling av freda rovvilt, ved å abonnere på vedtaka (epostvarsling).

Med helsing

Ulf Lucasen (e.f.)
ass. miljøverndirektør

Dokumentet er elektronisk godkjent og har ingen signatur.

Kopi:

Statens naturoppsyn - Rindal	Postboks 5672 Sluppen	7485	TRONDHEIM
Tingvoll kommune	Midtvågvegen 2	6630	TINGVOLL
Møre og Romsdal politidistrikt	Postboks 1353 Sentrum	6001	Ålesund